

李继鄩

重訂驗方新編卷之十一

癰毒

○癰毒論

王洪緒曰癰疽二毒由於心生蓋心主血而行氣氣血凝滯而發毒毒借部位

而名藥宗經治而誤患盛而踰徑寸者紅腫稱癰癰發六腑若其形止數分乃言小瘡按之陷而不即

高頂雖溫而不甚熱者膿尚未成按之隨指而起頂已軟而熱甚者膿已滿足無膿宜消散有膿勿久

留膿消一品立能消腫止疼為療癰之聖藥白陷稱疽疽發五臟故疽根深而癰毒淺根紅散漫者氣

虛不能拘血緊附也紅活光潤者氣血拘毒出外也外紅裏黑者毒滯于內也紫黯不明者氣血不充

不能化毒成膿也膿色濃厚者氣血旺也膿色清淡者氣血衰也未出膿時癰有膿裏火毒之滯疽有

膿理寒疫之凝既出膿後癰有熱毒未盡宜托疽有寒疫未解宜溫即患疽酷暑仍宜溫暖如生熱毒

嚴冬尤喜寒涼然陰陽虛實之治迥別閱古書總未詳因立其旨備覽焉諸疽白陷者乃氣血虛寒凝

滯所致初起毒陷陰分非陽和通膿何能解其寒凝已潰而陰血乾枯非滋陰溫陽何能厚其膿漿蓋

氣以成形血以華色故諸疽平塌不能逐毒者陽和一轉則陰分凝結之毒自能化解血虛不能化毒

者尤宜溫補排膿故當潰膿毒氣未盡之時通其膿理之功仍不可緩一容一縱毒即逗留一解一逐

毒即消散開膿裏而不兼溫補氣血虛寒何以成膿猶無米之炊也滋補而不兼開膿僅可補其虛弱

則寒凝之毒何能覓路行消且毒盛者則反受其助猶車粟以助盜糧矣滋補不兼溫暖則血凝氣滯

孰非釀膿之具猶之造酒不暖何以成漿造飯無火何以得熟世人但知一概清火以解毒殊不知毒

即是寒解寒而毒自化清火而毒愈凝然毒之化必由膿膿之來必由氣血氣血之化必由溫也豈可

涼乎况清涼之劑僅可施於紅腫癰癰若遇陰寒險惡之疽溫補尚慮不暇安可妄行清解反傷胃氣

甚至陽和不振難潰難消毒攻內腑可不畏歟蓋脾胃有關生死故首貴止痛次宜健脾痛止則惡氣

自化脾健則肌肉自生陽和轉盛紅潤肌生調和補氣養血之劑仍以犀角羚羊連翹等性寒之藥始終咸當禁服 癰之與疽截然兩途陽症為癰陰症為疽治法迥別世人以癰疽連呼並治貽害無窮古今方書雖陰陽虛實之分治法難期盡善惟王洪緒先生別號林屋山人所著外科全生一書乃其世傳秘本剖析陰陽虛實之理至精且備不施升降不用刀針經歷四十餘年用藥從無一誤開卷瞭於指掌可以不學而能書只前後兩集其價甚廉板存江南省城湖南湖北坊間間亦有賣各宜購置一部不惟自便亦可濟人留心瘍醫者尚毋忽諸 ○癰毒治法 凡患色紅腫痛根盤寸餘者是癰

毒發三四日尚未作膿以洞天嫩膏貼之內服醒消丸熱陳酒送下三錢即止其痛夜間得睡次日皮即起皺再服全消如過四五日將要作膿亦服醒消丸腫消痛止如作膿腫脹未破者用代刀散酒服即穿外貼洞天膏數日收功如根盤數寸者在背心腰後腰腹肚腋陰囊等處險要之地用五通丸醒消丸早晚輪服一次用敗毒湯送下皮皺痛息若已穿破用托毒散醒消丸早晚輪服自有奇效如根盤不滿一寸亦紅腫者名癰用蟾酥丸梅花點舌丹即愈此林屋山人經驗方也 ○肺癰方見肺部

○腸癰 腸癰有生于腸內者腹內脹急大小便牽痛如淋轉側搖之如水聲潰後則膿從大便出有生腸外者肚臍腫痛作脹或一足彎曲口有臭氣或膿自臍出甚則腸穿有虫自臍中出勢難為計初起宜用牡丹皮散以消之潰爛則用參耆內托之劑 牡丹皮散丹皮五錢薏仁一兩瓜蒌仁去油二錢挑仁去皮尖研二十粒水煎服此孫真人千金方也 又方多服六一散見內外備用諸方膿血從大便出膿盡即愈至神至穩之方也 又方皂角刺一兩至少用八錢酒煎至七分溫服膿血從大小便出而愈不飲酒者水煎亦好 又方大黃炒朴硝各一錢丹皮白芥子桃仁各二錢空心煎服小腹堅硬而熱按之則痛肉色不變或紅赤微腫出汗畏寒小便亦多脈緊實而有力服此神效 ○肚癰

肚腹生癰即腸癰也照上腸癰各方治之 ○臍癰 方見肚腹部 ○懸癰 方見海底部 ○對

口 方見頸項部 ○發背 搭手 均見背部 ○魚口便毒 方見陰疽門橫痃症 遍身肢節

生瘡 此名疳蝕因風寒所搏氣血凝滯故也用蠶繭每繭一個入白礬五分火煨過之後每礬一兩

另加陀僧五錢白芷一錢研末蜜調敷 ○筋骨疼痛潰爛生瘡 此因誤服輕粉及丹石諸藥以致

毒凝筋骨日久不愈查解救諸毒門輕粉毒方治之 ○身上忽然紅腫遊走不定或痛或癢 此丹

毒也照後遊風丹毒各方治之 ○身生疔瘡如塊如核此流注也與上遊風丹毒忽然而發者不同

照陰疽門流注方治之 ○疔瘡 凡疔瘡好而復發此疔根未出故也若不急治再發則根深難治

有拔疔根法見後 疔瘡發之最速有朝發夕死隨發隨死有三日五日而不死至一月半月而終死

者其毒最烈或發寒熱或發麻木或嘔吐或煩燥或頭暈眼花或舌硬口乾或手足青黑或心腹脹悶

或精神沉困或言語顛倒此皆生疔之症其形或大或小或長或圓其色或白或黃或紅或紫或有紅

絲名色甚多治法則一倘辨別不清以生黃豆令本人嚼之如無豆腥之味即是疔瘡 疔瘡多生暗

處或痛或不痛或癢或不癢發時人多不覺若不早治最易誤事有發寒熱數日而後生者有當時生

者初起如粟米大或大小不一如發寒熱及麻癢嘔吐等症即于遍身留心尋認凡鬚髮眼耳口鼻肩

下兩腋手足甲縫囊門陰戶等處更宜細看一日須看數次有則照方醫治若前心坎後背心有紅點

者即照後羊毛疔方治之如尋覓不見取甌中氣垢少許納口中必有一處痛甚即知疔瘡所在須急

宜刺出惡血以見好血而止諸瘡及刀鎌疔忌用刀針餘疔不忌毒重者急服護心散見癰毒諸方或菜

子油真麻油菊花飲亦可 蜘蛛拔毒法先將疔頭用磁片刺破尋活蜘蛛一個越大越好放疔瘡上蜘

蛛一見自能奔往吸拔其毒少時蜘蛛不動即取放冷水中自活如疔未愈可用蜘蛛再行吸拔或另

取蜘蛛用之以毒盡為止無論疔在何處雖毒重痛極不省人事命在垂危立可回生此急救第一良法凡手指生蛇頭瘡及毒蛇毒虫咬傷皆可照此拔毒 菊花飲白菊花葉連根用搥取自然汁一茶鍾滾酒兌服用酒煮服亦可不如生汁為妙毒重者宜多服渣敷患處留頭不敷蓋被睡臥出汗其毒自散無論生在何處雖欲氣絕亦可起死回生至穩至便至靈諸方皆不及此切勿遲疑自誤無葉用根若無即用藥店中乾白菊花四兩少則不效甘草四錢酒煮溫服亦可 大戟膏見癰毒諸方敷之即愈再發再敷無不神效 地丁飲紫花地丁一兩白礬甘草各三錢銀花三兩煎服各疔俱效有人生紅絲疔已走至乳旁服之立愈真神方也 葱簪散明礬三錢研細葱白七個二味共研爛分作七塊每塊以熱酒一鍾送下服完即睡蓋被取汗如無汗再服蔥頭湯一鍾少頃汗出如淋其病若失此方不但治疔一切惡症皆治初起未成膿者更妙 烟油膏用烟桿中烟油厚敷四圍留頭不敷少刻疔破出水而愈奇效如有紅絲者用烟油離絲三分處敷之絲即不走 又方黃色唐鷄糞厚敷四圍將疔頭挑破不敷極效 又方生黃豆嚼爛敷之極效 頭面諸疔救唇湯紫花地丁金銀花各一兩白菓二十個桔梗生甘草知母各三錢水煎服至重三劑必愈此方治頭面口角疔毒俱效唇疔尤妙 又方一人唇口生疔七個頭腫如斗心悶神昏百藥不效後有人云此名七星趕月用虻虫搗爛敷之頃刻瘡口流出黃水腫消神清次日全愈如無虻虫以五穀虫一錢瓦上焙研末白礬三分蟾酥三分以燒酒溶化共調勻敷疔上少刻疔亦破流毒水而愈 又方凡口唇生疔看大腿彎中如有紫筋用銀針刺出血即愈有人不知疔在何處但唇內瘡極須臾半面腫硬痛甚見腿後起有紫筋刺之立效 又方雄鷄冠血點上其效如神 又方大蝦蟆一個取肝貼之立消兼治面上生疔對口疔等症 又方生蜆去殼搗融敷即消 又方烏色草魚去鱗取皮切片貼之隨貼隨乾乾則另換換至數十

次即破口而愈矣。○紅絲疔 此疔流走最快生於足者其紅絲漸長至臍生於手者紅絲漸長至心生於唇面者紅絲漸長至喉至則不能救矣手足兩處可用頭髮離絲一二寸遠緊緊捆住並將絲頭刺破或用燈火或用艾火在絲頭燒之絲即退散而愈不散再燒以散為度極效或照前各方治之

○刀鏹疔疔形如韭菜寬長一二寸肉色紫黑者是忌用針刺用前葱礬散服之並唐雞糞敷之即愈遲則毒歸心臟致命。○羊毛疔 初起頭痛身發寒熱前心坎後背心有紅點如疹子形先用針挑

破取出羊毛再用明雄末二錢青布包紮蘸熱酒於前心坎瘡上一二寸外四圍團團擦之漸漸擦入瘡眼其毛即奔至後背心再發於後背心照前擦之其羊毛俱拔於布上即埋入土中內服菊花飲或葱白飲地丁飲俱見前護心散見癰毒諸方俱效。○羊毛疔瘤 此症忽起一泡其形如瘤內有羊毛亦名羊疔初起或頭痛或發寒熱即是用黑豆蕎麥各等分研末挑破敷之毛落即愈內服菊花飲

亦可。○疔瘡出血不止 飲真麻油一大碗即止或飲菜子油更妙。○疔瘡走黃 凡疔毒腫痛神昏甚至不省人事謂之走黃急用芭蕉根搥汁服之立可回生或照前菊花飲地丁飲服之均妙。○

拔疔根法 疔毒重者好而復發此疔根未出故也若不急治再發則根愈深而難治矣單麻子一粒去油乳香一分去油共搗爛用飯和為餅貼之少時疔根自出。○疔瘡通驗丹 乳香去油一兩八錢廣膠三兩搥碎放碗內和晒松香一兩八錢用葱五根清水煎淨研末老姜汁三兩搗汁拌藥勻晒

一方用 猪膽一百二十個用竹籤挑開擠汁拌藥勻晒各藥切勿見鐵見火必須日晒更防見雨

用時將藥挑塗瘡口或將青布為膏藥貼之其效無比病者須忌葷腥合藥務必三伏天以便太陽照晒兼之虔誠修合口以濟人為念毫無圖利之心定然得心應手受天之慶矣。○拔疔膏 治五種十三疔并三十六疔初起麻癢怯寒口嚼黃豆不知腥臭者是也野菊花一錢五分山慈姑一錢五分

天花粉一錢木耳三錢俱用瓦炙川貝母二錢去心瓦炙用黃酒煮透晒焙俱可知母二錢瓦炙用黃酒煮透晒焙亦可皂角刺三錢瓦炙升麻一錢五分瓦炙甘草五分生研不見火硃砂三錢飛淨血竭一錢五分麝香五分蟾酥二錢酒化不見火草麻子肉一兩去殼去衣搗為極爛紫花地丁三錢瓦炙金線重樓三錢瓦炙存性俱研細末再將六味和搗均勻乾加麻油再搗成膏磁盒收貯 ○飛龍奪命丹 治一切惡疔腫毒等症蟾酥乾者二錢搗碎酒拌乳香去油二錢沒藥去油二錢雄黃三錢輕粉五分膽礬一錢麝香五分銅綠二錢冰片五分寒水石二錢研末蝸牛三個去殼研入蟾蜍蜈蚣去頭足五分人信火煨去煙五公分研極細末和勻將蝸牛研藥為丸蝸牛或加倍用硃砂為衣如梧桐子倘藥味乾燥或濃米飲潤之此丹乃疔瘡腫毒開手要藥必不可少也蝸牛必要十一個去殼搗爛絞汁和藥 ○解毒湯 黃連黃芩黃柏生山枝各一錢五分水煎服 ○消毒飲 金銀花三錢野

菊花一錢二分蒲公英一錢二分紫花地丁一錢二分天葵子一錢二分水二鍾煎八分加無灰酒半鍾再滾二三沸趁熱服其藥渣如法再煎服蓋被有汗為度 ○復生湯 金銀花山枝生研地骨皮牛旁子炒研木通連翹去心牡蠣煨粉生大黃皂角刺沒藥去油乳香去油花粉各八分酒水各一鍾煎一鍾食遠服不能飲者只用水煎臨服入酒一盃和服亦效脈實便閉加朴硝 ○全命湯 服之速效能內消腫羌活獨活青皮防風倍用黃連天花粉赤芍細辛蟬退僵蠶桔梗歸尾川芎白芷連翹山枝仁甘草節金銀花分兩酌用在脚加木瓜牛膝薏仁一方加澤蘭一錢生薑十片蔥三莖煎熟服以衣被覆之有汗為妙 七味煎 蒼耳頭三錢野菊花三錢稀莖草三錢丁香三錢半梔子三錢蚤休二錢麻黃一錢用好酒一斤煎至一碗澄去渣熱服蓋被有汗為度 ○安神散 人參麥門冬去心茯神黃耆白朮土炒元參陳皮各一錢石菖蒲甘草炙酸棗仁炒研遠志去心五味子研各五分

水二鍾煎八分臨服入硃砂末三分和勻食遠服 又方葱白加蜜搗融將疔刺破敷之如人行五里其根自出又癰毒諸方門紅膏藥方拔疔最效 ○楊梅瘡 此瘡最毒治不得法多致纏綿不救且

最忌服輕粉服則毒留筋骨難以斷根抑且不能生子若已服者即用解輕粉方見解救諸毒門治之

○紅棗丸

紅棗三斤以杉木作柴煮之煮熟刺去皮核多取燒過杉柴枯炭磨細末和棗肉搗勻

為丸彈子大每日任意食之切勿間斷雖瘡毒滿周身或服過輕粉及一切丹石隱藥致成結毒穿頂穿鼻潰爛不已多年不愈者服之大有奇效至穩至靈此治楊梅結毒第一方也愈後再服一兩月斷

根紅棗能解丹石之毒杉木專祛濕熱之侵是以奏功若反掌也忌醋與辣又名青椒及一切發物半

年外用蝦蟆散

又方土茯苓一兩木通白鮮皮防風各一錢宣木瓜薏仁金銀花各二錢皂角子四分水煎服每日服一劑以愈為度外用蝦蟆散見癰毒諸方敷之無論久近重輕潰爛穿頂屢試屢驗

百發百中最忌食茶不服藥則不已並忌醋與辣椒及一切發物半年終身戒食蝦蟆倘不服藥即服前紅棗丸外用蝦蟆散之亦愈 又洗藥方生甘草金銀花蒼朮白芷霍香槐花各二錢共煎水洗輕

者內服前方外用此藥洗即愈

○避楊梅瘡法

凡生楊梅瘡在傍俟候親近之人難免傳染用雄

黃川椒去子各五錢研末杏仁百粒蒸熟去皮尖炒研末燒酒打粉糊為丸梧桐子大每服十五丸開

水下於病人初發時服即能免也

○瞎眼瘡

上高下深顆顆累垂如瞎眼其中帶青頭上各露一

舌者是也用同陽玉龍膏真君妙貼散見陰疽諸方敷之必效若仍不愈用蝦蟆散治之或後陰疽方

更妙 ○貓眼瘡 瘡似貓兒眼有光彩無膿血痛癢不常飲食減少名曰寒瘡照上瞎眼瘡治之

○天蛇毒

有人遍身潰爛似癩非癩號呼不已一僧視之曰此天蛇毒非癩也用秦皮又名搭皮又

名搭皮又名石檀又名苦樹又名苦澀煮汁一斗日服十四碗三日全愈又草花間蜘蛛螫人為露水

所濡乃生此瘡者亦名天蛇毒瘡可以此方治之天蛇大似箸而扁長三四尺色黃赤人遭其蟄不治必死 ○蛇形瘡 一人生瘡似蛇長數寸外用雄黃麻油調敷內用雄黃沖酒飲即愈 ○纏蛇瘡

又名纏腰龍此丹毒也生腰下長一二寸或碎似粟或紅腫堅硬用燈火向兩頭燒五次並用雄黃外敷內服極效 又方陳石灰麻油調敷即效 又方舊糞桶箍篾燒灰麻油調敷其效尤速或照

避風丹毒各方調治 ○魚脊瘡 多生筋骨間堅凝作痛初起白泡漸長狀似魚脊破流黃水此陰

症也初起時無論已潰未潰宜用隔蒜灸法見癰毒通治門以通陽氣外用回陽玉龍散真君妙貼散見陰

疽門敷之或用後陰疽諸方更妙 ○魚臍瘡 窄而長腫而黑者此是風毒蘊結或氣血凝滯或誤食

人汗所致用蜡豬頭骨燒枯研末生雞蛋白調搽數日即愈 ○蜂窩瘡 不拘何處形若蜂子窩者

是罐鑿一小孔納碎布數團火燒取煙從小孔出向患處薰之二三次即愈 又方愈而復發者用鉛

粉硃砂和蜜調敷神效 ○蜘蛛瘡 形似蛛網瘡不能忍豈腐衣又名豈腐皮燒枯存性香油調搽

○蚯蚓毒 此症鬚眉皆落形似麻瘋或間身上有蚯蚓聲用食鹽數斤熬湯洗身數次內服淡

鹽水一二碗極效切勿悞為麻瘋若真是麻瘋令病人站立打銅鐵之風爐火傍望其臉紅是麻瘋臉

綠者非也兩手大二指合攏處肉平塌者亦是 ○螞蟥毒 形似珠顆成片成串或紅或白破則流

水好而復發用川山甲瓦上焙枯研末香油調敷雖多年不愈者無不神效 ○蠅蟻瘡 蠅蟻又名

搔甲子俗名偷油婆又名蟻螂其瘡初似粟米漸大如豆更似火烙漿炮疼痛至甚者以春茶葉研末

麻油調搽效 又方燕子窩泥和豬膽加酒調搽或照後瘰癧毒各方治之 ○葡萄毒 一小兒年

五六歲額上忽起一顆紫色光亮形似葡萄頃刻周身皆有一老醫見之云此乃葡萄疔毒一見鼻血

即死因小兒飲食言笑如故病家不信至夜半忽鼻中血若湧泉而死又一男子手腕上忽起一粒若

紫葡萄半日亦見鼻血而死俱無藥救附錄於此以俟博識者立方施治又一女年十四手腕軟處生物似豆半在肉中紅紫色痛甚百方不效後用水銀四兩白紙二張將水銀揉熟擦之三日自落合而觀之前症似可照此施治 再前症即名疔毒又見鼻血其為熱毒內蘊無疑水銀擦之若不效應急照前癰毒諸方門內菊花飲菜油飲二方治之或有救也並用吳茱萸末熱醋調敷兩腳心一日一換此引熱下行至妙法也 ○瓜藤瘡 一身十餘個即是尖尾芋茄子葉五月艾蔥姜共搗爛醋煮敷

擦 ○瘰癧瘡 手足肩背累累似豇似米大者若梅若李或赤或黑或白或青初生有痂一層痂內有核核有深根能爛筋骨毒入臟腑即死此熱毒也先將痂挑破用醋和微溫淘米水洗淨以芙蓉散見癰毒諸方門治之自流毒水內服真菜子油麻油亦可極效 又方燕子窩連泥帶糞和初生百日內男孩糞調搽或真菜子油或麻油亦極效此孫真人千金也 又方猪膽汁敷之流出毒水極效

又方男子尿桶中白霜敷之立刻清涼止痛乾則再敷

又方鍋墨煙以燒草者為佳燒煤炭者勿

用桐油麻油菜油均妙調搽即愈

又方照遊風丹毒門防風升麻湯菜子油六安州茶葉各方治之至穩至效 ○天泡瘡 形似水泡者是用蓮蓬即蓮房燒枯研末并泥調敷神效或用荷花瓣貼之

或照後黃水瘡各方及癰毒諸方門松香散雞腰膏治之更妙又遍身生燎泡如甘棠梨破則水流復生內有小石一片方見卷十六奇病門 ○黃水瘡 初如粟米癢而兼痛破流黃水浸淫成片流處

即生由脾胃濕熱外受風邪相搏而成發於心下者若不早治難救宜用青蛤散蛤粉一兩煨真青

黛三錢熟石膏二兩輕粉黃柏各五錢共研細末先用香油調成塊次用涼水調稀塗之神效並治鼻

中生虫 又方紅棗燒炭八錢飛黃丹松香枯礬各四錢石共為末麻油調搽 又方輕粉樟腦各二

錢大楓子去殼川椒各四十九粒杏仁一錢共為細末和柏油燭搗勻敷之功效神驗柏油又名捲油

又名棧油即烏柏子油也或用癰毒門松臘散蘆薈散燕泥散雞腰膏均極神效。○熱瘡 其色紅而作痛者是用男子尿桶中白霜敷上立刻清涼止痛乾則再敷或照上療疽瘡各方治之亦可。○

漆瘡 杉木屑煎水洗用活螃蟹香滑舌和蜜調敷甚效此林屋山人方也有漆之處先嚼川椒數鼻孔可免漆瘡。又方貫眾焙枯研末香油調敷或用韭菜搗汁敷或用白羊乳搽之均效。又方活螃蟹

蟹搥汁滴入使毒水流出自愈如已腫爛取生蟹黃塗之其爛更甚數日即愈。○癰瘡 凡癰內有虫治好復發非藥不神虫未盡也發後再治無不愈矣頭面生癰如入眼內即成大痲瘋矣宜急治之新鮮皂角刺一二斤搗爛熬至將成膏時加好醋熬稠將癰割破敷之日刺日敷自有毒水流流出流盡

再敷十日雖數十年陰頑惡癰無不斷根此林屋山人神方也。又方斑蝥五分生半夏一錢雞蛋油調搽數次則痛必愈再發再搽雖多年惡癰無不斷根取雞蛋油法見癰毒諸方。又方用新綿花

扯成如紙薄一層量癰寬大將綿花鋪貼用火向花上一點頃刻燃盡當即止癢而且並不疼痛不須用藥極簡易極效驗只須一次全愈倘次年再發照治一回斷根。又方珠蘭花葉時時擦之半月斷

根。○小兒乳癰

小兒初生症類疥癩先起手足次遍腹背纏綿不已先用僵蠶不俱多少去嘴研

末煎湯浴之或一日一次一日二次毒出再用真青黛黃柏枯礬雄黃百藥煎硫磺各等分研末濕則乾搽乾則香油調搽以愈為度名換形散。○皮症 杏仁去皮尖炒黑研如醬擦上即愈或照癰瘡

各方治之。○疥瘡

疥有五種乾疥濕疥虫疥砂疥膿疥俗名膿泡瘡又名黃膿泡是也由各經蘊

毒日久生火兼受風濕而成數日延及遍身最易傳染或癢或痛癢者內必有虫不獨虫疥然也治法雖多有效有不效有此用之而效彼用之而不效者後列各方五種疥瘡皆治古方有薑藥一法瘡雖

易愈然毒盡歸腹定成蠱脹危症切宜戒之如已成蠱脹查癰毒雜治門本方治之。○黃香散

硫磺川椒各五錢共研末加薑蔥頭各五錢和生豬板油搗融用布包好烘熱時時擦之其效甚速
又方整塊川厚朴以真香油磨濃加醬加枯礬少許搽之數日退盡此膿窠疥瘡神方也 ○合掌散

硫磺一兩鐵繡一錢紅矾六分共研極細

底如

麵細蔥汁調敷大碗內周圍敷勻勿厚勿薄以碗覆瓦上

取艾於碗下燒薰薰至藥乾敲之如空碗聲為度取藥再研細每藥一錢可敷數次臨用以右手中指
粘滿香油再粘藥搽入左手心合掌摩擦止有藥氣不見藥形然後以兩手擦瘡每日早晚二次三日
掃光再擦三四日即不發矣屢試神驗並治陰囊濕癢 又方核桃仁連皮用一兩又名胡桃大楓子
仁五錢水銀三錢共搥極融爛先用此藥一二錢不可過多放在手心中擦勻將左手心在肚臍眼上
順著摩擦不可倒擦擦至手心發熱即止再用此藥一二錢攷右手心中擦勻在肚臍眼上照前摩擦
擦至肚腹滾熱即止每日一次瘡上不擦輕者一日即愈至重三日斷根有人遍身膿疥時發時愈纏
延三載百藥不效用此三日而愈從此斷根此治五種疥瘡第一神方一切濕熱瘡疾皆治珍之寶之
愈後宜食愈瘡藥見後癰毒諸方以補脾土或另服健胃之藥亦可如恐水銀入腹為害病愈體壯之後
每早用真川椒要開口的七粒滾水空心吞服連服三日其水銀自入椒內由大便而出或用真川椒
末鋪床上被蓋睡臥水銀即由毛孔而入椒內矣此法最妙 ○凍瘡 橄欖核燒灰存性研末加輕
粉少許香油調擦神效 又方陽和解凝膏見陰疽門貼一夜即愈潰爛者貼三張收功此林屋山人
方也 ○大痲瘋 此症各方凡殺蛇治愈者務戒殺放生方能全愈 痲瘋者身上必有痲木之處
針之不痛然後發現於外若不痲木則非痲瘋身雖痲木數月即發現於外雖重易治若年久病深壞
形變貌鼻塌肉崩手指脫落足底穿爛則難治矣江西蕭曉亭著有痲門金書二本專治痲瘋所論病
源最為透徹其治法亦極神妙板存廣東省城雙門底刻字店 痲瘋謬云正報似非妄談若自信罪

行難逃果能矢念為善人力可以回天即自信並無過惡亦當力行善事所謂善事者守禮守法常有善念見善必為尤宜謹戒殺生並須放生果能如此不但病易愈且為後嗣種福所益多矣曾克廣五服方昔在萬安縣百嘉地方遇一良醫善治瘋癩惡疾活人甚眾余甚奇之具金百餘求得此方歸家後適鄉鄰有患此症者依方用之數月而愈頻年以來遠近用此方者十愈八九屢試屢驗真神妙方也初服方羌活蒼朮荊芥防風銀柴胡元參赤芍黃芩白蘚皮枳殼銀花甘草水煎服四劑次服方羌活細辛白芷生地防風知母黃芩川芎甘草水煎服二劑三服方大黃朴硝銀花桃仁枳殼黃連黃柏黃芩元參水煎服三劑四服方荊芥防風川芎童便浸後米汁煮白附子姜汁蒸天麻僵蠶姜汁蒸蒺藜藜水提過炒去刺獨活元參火麻仁洗去土炒苦參赤芍黃柏銀花甘草枳殼大楓子水煎服十劑以上依次空心服俱不加引五服九元參枳殼白芷各二兩赤芍銀花各一兩火麻仁蒺藜大楓子各一斤獨活二錢製川芎一個北防風十兩以上共研細末斬蛇去頭尾十二兩用熱酒浸二三日秋冬浸五六日浸鬆後去骨蒸熟焙乾研末和前藥蜜為丸每日早午晚三次各服四錢茶送下○皂刺散一人得麻瘋惡疾雙目風盲眉髮俱落鼻梁倒塌遇一異人傳方用皂角刺三斤燒枯蒸一時久曬乾為末每日飯後服二錢大黃煎濃湯調下半月後眉髮再生目明肌潤○白花蛇丸丹陽上舍得麻瘋疾一僧療之而愈以數百金求方不肯傳館賓袁生窺藏納衣領中因醉而竊錄焉用者多效白花蛇一條烏梢蛇一條並去頭尾生用防風蟬脫去泥土生地川芎苦參枸杞槐花銀花以上二兩白蒺藜全蝎醋浸一日去鹽味北細辛蔓荊子威靈仙何首烏胡麻仁炒香金毛狗脊川牛膝烏藥天花粉川連黃芩枝子黃柏連翹牛旁子以上各一兩炒漏蘆半斤去苗洗淨四兩芥穗一兩五錢上頭面者加白芷一兩肌膚潰爛者加大皂角一兩共研末米糊為丸桐子大每服五六十

凡茶送下午後臨卧各一服。○白鹿洞方 治大痲瘋眉毛脫落手足拳攣皮骨潰爛唇翻眼綻口歪身痲肉不痛癢面生紫斑並治如神真靳蛇八兩去皮骨酒浸焙乾獨活蘇薄荷全蝎洗去鹽蟬脫去足儘蠶炙去足赤芍以上各六兩楓子肉去淨油天麻酒浸防風白芷酒浸金毛狗脊去毛酒浸白菊花漢防己何首烏各鐵當歸酒浸苦參以上各四兩金頭蜈蚣多去頭足穿山甲燒大川芎梔仁炒連翹白蘗以上各二兩共為末酒糊為丸梧子大每服七八十九空心用好酒送下臨卧再一服忌氣怒房事油膩煎炒雞魚蝦蟹芋頭山藥糟魚肉鵝生冷酸食冬月亦不可烘火宜綿煖淨室坐定保守性命節飲食斷妄想服藥時宜仰卧令藥力通行有功如不守禁忌徒勞心力亦無效也服此藥只宜食鴨鰱魚牛肉俱宜淡食。○秘傳漆黃蟾酥丹 鮮螃蟹四個真生漆一斤真蟾酥明雄黃各二兩先將磁罈裝蟹次入漆封口埋在土中十四日足方取開看二物俱化成水去渣淨將水入鍋慢慢火煮焙乾為細末方入雄黃蟾酥二味末攪勻磁罐收之每日空心各一服好酒送下二錢不過一月其瘡全好除根妙不可言治大痲瘋如手取之妙况所費不多莫輕忽修合亦勿妄傳匪人秘之。○癘風方 鎮江丁參領得此秘傳治之全愈又以醫治多人無不取效如神但患此症者眉毛若盡脫落其症難治若眉毛未脫雖手節骨有塌損者皆可取效若初起未深之症百試百效也先用湯藥四劑每日一劑服完每服丸藥每丸一錢加楓子膏春秋八釐夏六釐冬一分 湯藥方陳皮白芷苦參天麻秦艽川續斷防風荆芥羌活風藤薏米牛膝當歸海桐皮蒼朮木香桂枝連翹甘草各三錢黑棗二枚生姜一片水二碗煎至一碗服渣再煎二次服 丸藥方大胡麻小胡麻白蒺藜各一觔四兩苦參一觔防風荆芥各八兩當歸蒼朮各六兩薏米續斷牛膝各四兩共研細末水疊為丸每日早午晚三服每服三錢或二錢照數加楓子膏搥圓攪和以細茶送服 楓子膏大楓子去殼取仁銅鍋內炒至三分紅

色七分黑色為恰好太過無力不及傷眼炒後研成細膏如紅沙糖一樣用銅鍋器盛向火上熬四五滾倒在紙上放地上面以物蓋之聽用如上面霉變拭去仍照常一年內切忌房事切忌食鹽犯之不愈並忌醬醋酒及一切雞魚發氣動風等物 又方活蛇一條要粗如酒杯大竹刀破去腸雜切寸段豎起放瓦上以火炙之蛇段跌倒者無毒取多存性不倒者勿用磨成粉拌入飯內與一遍身白毛鴨食之次日鴨毛盡脫以鴨殺之砂鍋內煮爛分作四五日食初食其腫更甚食至二三日後漸漸平愈雖潰爛不堪食之亦效此林屋山人驗方也 又方桑皮大黃芒硝各一撮水煎於無風處日洗二次如有虫加鴿糞同煎如爛用琥珀末搽患處此神方也 ○遊風丹毒 名天火又名流水俗謂風庖疙瘩是也此症身上忽然紅腫或大或小或痛或癢甚至遍身皆有遊走無定有初起白斑漸透黃色光亮皮中恍如有水脹墜破流黃水濕爛多痛為水丹又名風丹多生腿膝屬脾肺有熱而夾濕也又色赤而乾發熱作癢形如雲片為赤游丹屬血分有火而受風也又遍起小白泡無熱無痛游走不定為冷瘡即冷丹由火毒未發肌膚外受寒鬱而致也又有腰間紅腫一道名纏蛇瘡方見癰毒諸症門又有雞冠丹茱萸丹兩種丹名雖多總屬心火三焦風邪而成其發甚速自胸腹起四肢者順而易治從四肢起於胸腹者宜急治之遲則難治 防風升麻湯防風升麻枝仁麥冬荊芥木通乾葛薄荷元參牛旁子甘草各一錢燈心十莖水煎服大便閉者加大黃枳殼各一錢水煎服忌魚腥雞鵝動風煖血之物犯則難治丹毒重者攻入心胃難救先服此藥以解內毒次用磁針刺去惡血則毒隨血散至神至捷百發百中 磁針刺法取磁器輕輕敲破取鋒利者一小塊用竹箸將箸頭破開橫夾磁片露鋒於外將線繫繫以磁鋒正對丹毒之處另用箸於磁鋒上輕輕敲之其血自出不可刺深傷肉未愈不妨再刺以紅消腫散散為度毒輕者不必刺 又方倘服上防風升麻湯不效即用四物消風飲

生地三錢當歸二錢荆芥防風各錢半赤芍川芎白鮮皮蟬退薄荷各一錢獨活柴胡各七分紅棗二枚水煎服必能見功此消風毒要藥也 又方清涼膏見湯火傷門敷之神效 又方馬蘭膏治新生

小兒紅赤遊風丹毒百不失一並治大人丹毒或兩腿濕熱伏於經絡皮面上不紅不腫其痛異常病者只叫腿熱他人按之極冷者此膏搽之立愈屢試皆效馬蘭頭不拘多少冬李無葉取根亦可斬人

謂之馬蘭頭他省不知呼為何名用水洗去泥搗爛絞汁以鷄毛蘸汁搽之乾則再換或調飛淨六一散搽之亦可 又方蚯蚓數條又名曲鱉放碗中加入白糖用碗蓋住半日後至遲一日即化為水搽之

極效無蚯蚓用蜥蜴俗名鼻涕虫亦可 ○血風瘡 疹子 瘡子均見遍身搔癢門 ○斑症 人有一時身熱即便身冷而滿體生斑如疹者乃火從外泄而不得盡泄於皮膚故鬱而生斑人盡以為

熱也用寒涼泄火之藥不效有斑不得消而死者亦可傷也用元參麥冬各一兩白芥子沙參各三錢升麻二錢白芷一錢丹皮五錢水煎服一劑斑勢減二劑斑紋散三劑斑影盡消矣此方妙在用元參

麥冬以消斑尤妙在升麻多用服二三劑升麻宜減半引元參麥冬以入於皮膚使羣藥奏功而斑無不消矣又傷寒門蝦蟆燕泥二方亦極效驗又週身發斑眼赤鼻脹氣喘毛髮硬如銅鐵方見卷十六

奇病門 ○白癰風 又名白駁風多生頭面白如雲片者是用白鱈油搽之無則取白鱈晒乾煎枯取油搽之即愈 又方豬肝一副白煮不用鹽一頓食盡忌房事一月漸漸自愈並治紫癰風春季豬

肝有毒勿用 ○紫癰風 即汗斑硫黃輕粉蜜陀僧斑整製存性樟腦各等分共研極細末俟出汗時用老姜蘸擦患處兩三日洗去即除根神效或用蜜陀僧為末黃瓜蒂擦之亦效 又方陀僧乾葛硫

黃海螵蛸川椒共研細末先用老姜切片擦患處後以藥擦之永不復發再用浮小麥煎水洗滌一次更妙 ○癭瘤 漸長漸大軟而不硬方書云其種有五肉色不變為肉癭筋脈現露為筋癭筋脈交

絡色紫赤者為血癭隨憂惱消長為氣癭堅硬不消為石癭有大似碗者有長而下垂者又有粉瘤漏
瘤風瘤各種又有羊毛疔形亦如瘤者治法見前疔瘡門 ○消癭五海飲 海帶海藻昆布海蛤海
螵蛸各五錢煎湯當茶飲甚效 又方櫻桃核好醋磨敷即消初起者甚效 又方石榴樹上寄生醋
磨擦之神效生頸上者更效 ○肉瘤每夜將睡時用新熟熱飯敷上冷則另換每晚連敷三次久而
自愈凡新起肉瘤如小彈子者治之屢見功效切勿輕視 ○血瘤甘草熬膏用筆蘸圈瘤四圍又用
羌花大戟甘遂等分為末醋調另用新筆蘸塗於甘草圈內務須離甘草一圈不可太近蓋藥性相反
切勿悞相攪和塗後次日瘤當縮小再如前法塗三四次即愈後須請名醫服藥消散以免復發
○粉瘤 用蜘蛛網纏住瘤根次日又換新蛛絲再纏約換四五次則瘤俱消內有結實小白粉用手
取不腫不痛 又方天花粉一兩陳壁土五錢穿山甲川貝母各三錢去心共為末和勻搽膏藥上不
論何膏貼之即穿出粉渣而愈 ○漏瘤 時出黃水好而復發癢不可忍查腿部膝瘡白油膏方治
之 ○虱瘤 此瘤其癢徹骨破開有虱無數內有極大一虱用針挑盡外貼玉紅膏見癰毒諸方自
愈 ○腋下癭瘤 長靛蘆燒枯研末油調敷以消為度一人腋下生瘤如長蘆樣久而破爛用
此敷之出水消盡而愈 ○肉核 真烏梅去核燒存性研末搽數日即消 又方生蘿蔔皮貼之連
貼數次即愈倘再不愈照陰疽門惡核方治之又遍身肉出如錐痛而且癢方見卷十六奇病門 ○
疣瘰又名瘰子拔之則絲長三四寸薑汁和好醋時時搽之有人生疣瘰屢治屢發照此治之三日斷
根 又方地膚子白礬煎湯洗數次即消立效 又方松香柏樹枝上油和勻敷之過夜即落 又方
牛口涎時時塗之即落 ○肉痣 小黑子是用針挑破以鹽水泡石灰點之即消 ○血痣 初起
如痣色紅漸大如豆觸破時流鮮血用黃蟬血同蒜汁好墨汁頻塗之血出甚者內服涼血地黃湯